



Preschaints 67 votantas e votants

Tractandas

- 1 Tscherna dals scrutinadurs
- 2 **Approvaziun dal rendaquint finanziel dal Cumün da Zernez per l'on da gestiun 2022 (bilantsch, quint da success e quint d'investiziuns) cun approvaziuns ed infuormaziuns da rendaquints da credits approvats**
- 3 **Approvaziun d'ün contrat da concessiun per la retratta d'aua da fuond cun la Terretaz SA a Zernez**
- 4 **Preparaziun e rinviaziun d'üna revisiun parziala da ledscha cumünala da chamonnas a man da la votaziun a l'urna**
- 5 **Comunicaziuns e varia**
 - 5.1 **Comunicaziuns**
 - 5.2 **Varia**
 - 5.3 **Surdatta dal premi d'energia 2022**
 - 5.4 **Saramantaziun dal suprastant cumünal Jürg Wirth**

Il president cumünal Domenic Toutsch salüda a las votantas ed als votants a quista radunanza cumünala da rendaquint. El ha constatà cha la bannida es gnüda protramissa a temp.

Domenic Toutsch manzuna cha quista es la prüma radunanza cumünala organisada da la nouv'eletta suprastanza cumünala. Il böt es da chattar soluziuns per üna gronda part dals abitants e na be per singuls. Ouravant infuorma il president cumünal davart futurs invids e missivas a radunanzas cumünalas. La suprastanza cumünala voul desister da trametter ün cudeschin relativamaing chargià cun infuormaziuns in mincha chasada. Mincha votanta e votant po annunzchar ün'unica vouta pro l'administraziun cumünala, cul giavüsch da surgnir listess il cudeschin üsità per posta adressada.

Il protocol no. 2/2022 da l'ultima radunanza cumünala dals 13 december 2022 es stat publichà. Dürant il temp da publicaziun nu sun entradas ingünas protestas cunter il protocol. Cun quai vala il protocol sco approvà.

1 Tscherna dals scrutinadurs

Sco scrutinadurs in sala sun gnüts tschernüts Ursina Godly e Gian Paul Müller.

2 **Approvaziun dal rendaquint finanziel dal Cumün da Zernez per l'on da gestiun 2022 (bilantsch, quint da success e quint d'investiziuns) cun approvaziuns ed infuormaziuns da rendaquints da credits approvats**

Il quint da success 2022 serra pro entradas da 20'857'788 chf e sortidas da 20'300'782 chf cun ün guadagn net da 557'006 chf. Quai pro amortisaziuns totalas da 869'705 chf e reservas nettas per finanziaziuns

specialas da 193'304 chf. Las investiziuns pel 2022 importan 4'696'525 chf ed il rechav per quistas importa 1'304'707 chf. Las investiziuns nettas importan cun quai 3'391'818 chf.

Cul guadogn da 557'006 chf implü las amortisaziuns da 869'705 chf, l'augmaint da las reservas da 193'304 e'ls levamaints dal chapital agen da 224'242 chf resulta ün'aigna finanziaziun da 1'395'773 chf. Quist import main las investiziuns nettas da 3'391'818 chf fuorman il manco da finanziaziun da -1'996'045 chf. Ils debits da banca sun restats in congual cun l'on avant identics e la somma da bilantsch s'ha augmantada per 653'268 chf da 14'711'549 chf sün nouv 15'364'817 chf. Il debit per persuna s'ha augmantà da 2'118 chf i'l 2021 per 1'273 chf sün nouv 3'391 chf i'l 2022.

Ils commentars finanziais chi's referischan als rendaquints 2022 implü ils duos rapports da revisiun sun stats publichats i'l documaint dal rendaquint.

Il manader da la secziun finanzas ed impostas, Erich Sulser repassa il quint da success, il quint d'investiziun e'l bilantsch in fuorma da diagram a culuonna cun alch survistas, infuormand sur dals puncts d'importanza.

I'l 2022 mancan raduond 1'000'000 francs d'entradas da fits d'aua da las OEE SA. Quist fat es da contribuir ad ün nosch on idraulic. La mancanza da quistas entradas chaschuna üna dretta foura illa chascha cumünala e demuossa cleramaing la dependenza dals fits d'aua dal Cumün da Zernez.

Il debit pro cheu (Pro-Kopf-Verschuldung) s'ha augmantà per 60% i'l 2022, quai chi'd es ün svilup fich negativ. A quist svilup es da dar cunterpais cun spargnar sül sector da cuosts e cun generar daplü entradas.

Ün votant as dumonda, scha la reduenziun da las entradas i'l conto da l'imposta fundiaria haja da chefar alch cun novas valütaziuns dals implants da las OEE SA? Quista suppuonüda po Erich Sulser confermar.

Il revisur extern dal büro Lischana Fiduziari SA a Scuol, Marcel Franziscus dà üna cuorta survista da lur lavur da revisiun, chi ha gnü lö dals 24 fin ils 26 avrigl 2023. Ils resultats da lur revisiun sun descrits in ün rapport public ed in ün rapport plü detaglià, drizzà a la cumischiun sindicatoria.

Tenor HRM2 es il cumün in dovair da preschantar al suveran ils rendaquints da credits approvats in simla fuorma. Nouv vegnan preschantats in quista tractanda divers rendaquints da credits approvats.

8181.5010.60 90'000 chf SIE Lavin Suorns

Il la radunanza cumünala dals 26-11-2020 es gnü approvà il credit d'investiziuns ill'otezza da 90'000 chf pel proget SIE Lavin Suorns. Seguaintas masüras sun gnüdas fattas:

- adattamaint ed ingrandimaint da drenaschas lung la via
- novas lingias da drenascha = 234m
- novas lingias da transport = 96m

Las lavurs sun gnüdas realisadas d'urant ils mais october e november 2021. Il proget es gnü sustgnü e contribui dal Chantun (uffizi da god e privels da natüra) cun 72 % (voul dir 90'673.30 chf).

Il surpassamaints da cuosts as lascha argumantar seguaintamaing:

- Causa la fich gronda quantità d'aua e scarpadas instabilas, as haja stuvü ingrondir il s-chav. Our da quist scopo haja dat üna considerabla quantità crappa da drenascha implü (total 344 m3), chi ha stuvü gnir transportada sül lö per cuvernar la drenascha.
- Il cumanzamaint d'execuziun es gnü spostà sün la fin d'october (capacitads da l'impraisa da fabrica). Il ris-ch d'ün müdamaint da las relaziuns da lavur (naiv e temperaturas fraidas) d'eira massa grond per ordinar üna interrupziun da fabrica.

Üna finischun da la fabrica, sainza avair fini giò la drenascha, füss stat collià cun gronds ris-chs da dons futurs vi da l'investiziun fatta. Implü füss stat necessari da cuntinuar cun las lavurs da prümavaira 2022 per garantir la funcziunalità. Quist fat vess chaschunà cuosts implü (installaziun, refacziun da dons eui.)

Il proget es serrà giò cun cuosts totals da 125'935.15 chf, dimena cun ün surpassamaint dal credit per 35'935.15 chf obain 39.9 % daplü sco previs. Implü sun las contribuziuns finalas per -27'673.30 chf plü otas sco previsas.

8711.5034.06 140'000 chf Spostamaint lingias Scheschna

Illa radunanza cumünala dals 12-12-2017 ha la radunanza cumünala approvà ün credit d'investiziun in l'otezza da 140'000 chf i'l quint d'investiziun 2018 (Qul) i'l conto 8711.5034.06 – Spostamaint lingias Scheschna chi'd es gnü necessari davo l'entrada d'üna dumonda da fabrica dal Chantun GR per lur nouva basa da servezzan. Eir sun gnüdas previsas contribuziuns da partidas pertoccas in l'otezza dad -80'000 chf. La differenza previsa da 60'000 chf va a charg da l'EW Zernez.

Il rendaint final da credit muossa oura ün suot passamaint dal credit, quai chi'd es allegraivel. Las partidas pertoccas Chantun GR, Foffa Conrad SA e Cunproprietaris frars Scandella sun orientats sur dal rendaint e til han eir approvà resp. surgni il quint final per pajar. Uschè po il credit gnir serrà giò e preschantà ad üna da las prosmas radunanzas cumünalas.

L'andamaint dal proget es stat complex, causa il svilup da planisaziun e da fabrica il prüm fich lungurus ed in seguit lura fich svelt dal fabricat da la basa da servezzan da l'uffizi da construcziun dal Chantun GR. Eir es stat da coordinar cun las lavurs eir complexas dal proget «EW Nord». Tuot es i bain ed ha fin l'ultim funcziunà a cuntantezza da tuots. In quist lö po il EW Zernez uossa quintar cun üna soluziun da la rait electrica fich stabila e parderta per tuot ils svilups.

Il credit es gnü suotpassà per -9'722.90 chf, quai sun -6,9 %. Ils cuosts restants pel cumün resp. per l'EW Zernez s'amuntan a 55'583.52 chf, dimena per -7.3 % resp. -4'416.48 chf plü bass co previs.

8711.5034.09 150'000 chf Indriz da cumpensaziun per sbagls illa rait

Illa radunanza cumünala da preventiv dals 30 november 2018 s'ha approvà ün credit il import da 100'000 chf per financiar la fabrica d'ün o da plüs indrizs da cumpensaziun per sbagls da la rait (Erdschlusskompensation). Ils indrizs sun i'l fratemp gnüts realisats da las OEE SA per part in Cul a Zernez. Ils cuosts vegnan scumpartits in relaziun als meters cabels süls singuls possessurs da las raits regiunalas e cumünalas. Pel provedimaint electric illa fracziun da Zernez vaiva quai fat oura dal 2018 raduond 85'000 fin 100'000 chf. La planisaziun e la realisaziun es statta suot la bachetta da las OEE SA a Zernez.

Vers la fin da l'on 2019 han lura ils respunsabels da las OEE SA infuormà ils pertocs, tanter oter eir il Cumün da Zernez sur da cuosts supplementars chi sun da spettar per la realisaziun da quist proget. Sün quai han ils respunsabels dumandà davo ün'argumentaziun a regard ils cuosts supplementars.

Quist 'argumentaziun es agiunt i'l text original da las OEE SA.

„Begründung der Mehrkosten Erdschluss-Löschanlage Zernez (dals 30-01-2020):

Der Kostenvoranschlag vom März 2019 basierte auf Kostenschätzungen, ohne dass Richtofferten angefragt wurden. Nach der Ausschreibung erwiesen sich die Baukosten als komplexer und damit kostenintensiver. Ebenso erwiesen sich die Kosten der Hochspannungsanlage und der Steuerung nach Eingang der Offerten als etwas höher, als wir aufgrund Erfahrungswerte kalkuliert hatten. Um die Gesamtsicherheit der Anlage sicherstellen zu können, musste das Konzept betreffend Automatisierung und Redundanz im Zuge der Ausführungsplanung angepasst werden. Dies hatte zur Folge, dass die Baunebenkosten (Planung) erheblich gestiegen sind. Diese Position wurde im Kostenvoranschlag stark unterschätzt.“

Ils respunsabels da l'EW Zernez han comunicà invers las OEE SA d'esser surprais dal svilup, ma da vulair acceptar l'argumentaziun a man d'üna proposta a la suprastanza cumünala per ün credit supplementar. Cun quai s'amuntan ils cuosts previsibels per quist proget pel Cumün da Zernez sün nouv 150'000 chf invezza da 100'000 chf.

La radunanza cumünala dals 22 gën 2020 ha in seguit deliberà ün credit supplementar da 50'000 chf. Cun quai s'amunta il credit approvà sün 150'000 chf pel proget 8711.5034.09 - Indriz da cumpensaziun per sbagls illa rait i'l quint d'investiziuns 2019 ff (Qul).

Il proget ha pudü gnir manà tras cun success. Cun quist indrizs s'es gnü davo a las pretaisas da la regulaziun federala da forz'electric ed a l'aspet da sgürezza. La seguainta survista muossa oura seguainta situaziun dal credit. Il credit es gnü suotpassà per -10'978.28 chf, quai sun -7.3 %.

8711.5034.12 145'000 chf Optimaziun da la rait da scumpart (rait tensiun bassa a Brail)

Il proget per l'optimaziun da la rait da scumpart illa fracziun da Brail tanter la vasca OEE/EW Zernez in Ils Muots e la staziun da transfuormaziun TS Brail es gnüda necessaria in connex culla surtutta da la rait da la Repower süls 1. schner 2021. Causa chi faiva tuot ün pa prescha vaiva la suprastanza cumünala decis da na

pudair spettar sün üna radunanza cumünala ed ha lura decis da preschentar inüsitadamaing la dumonda da credit a la prosma votaziun a l'urna, chi staiva güst sül program.

Text da missiva dals 25-04-2021: Daspö ils 1. schner 2021 es la rait da scumpart electric (Verteilnetz) illa fracziun Brail in possess dal cumün e vegn gestida da l'EW Zernez. In connex cul proget „EW Süd“ - approvà da la radunanza cumünala als 12-12-2017 - vegn realisà quista prümavaira/stà la colliaziun da bloc da cabels tanter Ils Muots (nord) e la staziun da transfuormaziun TS Brail. In quist connex survain la fracziun da Brail üna colliaziun da cabel electric suot terra, quai chi augmainta considerabelmaing la sgürezza futura da furniziun da forz'electric.

Illa fracziun da Brail daja i'l 2021 ün svilup fich dinamic. Güsta duos chasas vegnan fabricadas, ün'ulteriura chasa plü gronda ha surgni ün permiss da fabrica e sün üna quarta parcella as rechatta ün proget plü grond illa fasa da progettaziun. Quist svilup sforza a l'EW Zernez da pussibiltar als privats ün attach electric sgür e sufficiaint. Quai nun es cun la situaziun actuala pussibel, causa in blers lös es l'attach actual suoglià (be) cun ün crap da protecziun da cabels (Kabeldeckstein). Ün müdar oura o trar davo cabels in simils cas nun es pussibel. Perquai sto gnir adattà il lö da „Ils Muots vest“ la rait da scumpart electric da tensiun bassa. Quist adattamaint es indispensabel e po gnir realisà güst insembel cullas lavurs dal proget „EW Süd“. Quist agir spargna cuosts e disturbis. Sper il provedimaint electric es previs d'investir in quist lö eir i'l provedimaint da la rait da fibr'optica, per uschè pussibiltar eir illa fracziun da Brail attachs a l'internet svelto (UHB – Ultrahochbreitband-Internet) cun televisiun e telefon. Üna radschun implü per proseguir cun quist proget. La finanziaziun dal proget vegn reglada sur ün proget d'investiziuns i'l quint d'investiziuns da l'EW Zernez (Qul 8711.5). Ils progets privats manzunats contribuischan eir fingià üna bella part vi da la finanziaziun, cun lur taxas d'attach chi vegnan inchaschadas in connex cun lur fabricat.

Il proget preschaint as po resguardar sco gratià. As po tantüna preschentar eir illa fracziun da Brail in quist lö üna rait da scumpart nouva, cun grondas pussibilitats da svilup.

Uschè po il credit gnir serrà giò e preschantà a quista radunanza cumünala. L'andamaint dal proget es stat eir quia complex, causa la coordinaziun ils differents progets da l'EW Zernez (TS Brail, EW Nord, EW Süd) ed eir causa la problematica dal bloc da cabels in terrain problematic.

Il credit es gnü suotpassà per -24'272.14 chf, quai sun -16.7 %.

8711.5044.24 270'000 chf TS Arduond (rait Arduond-Carolina)

Illa radunanza cumünala dals 30-12-2018 ha la radunanza cumünala approvà ün credit d'investiziun in l'otezza da 270'000 chf i'l quint d'investiziun 2019 (Qul) i'l conto **8711.5044.24 – TS Arduond**. Eir sun gnüdas previsas contribuziuns da partidas pertoccas in l'otezza dad -265'000 chf. La differenza previsa da 5'000 chf va a charg da l'EW Zernez.

Il rendaint final da credit muossa oura ün surpassamaint dal credit e da las contribuziuns.

Quist ha da chefar cul fat, cha d'ürant il svilup dal proget, chi nu d'eira als 30-11-2018 amo dal tuot elavurà in detagl, ha la VR (RhB) giavüschè e dumonda da pudair eir güst incablar la lingia da mezza tensiun tanter lur viaduct in God Arduond e Carolina, plü o main sün lur cuosts. Quist ha lura la direcziun da l'EW Zernez confermà, cun savair ed as esser consciaint da surpassar il credit, però eir cun avair abinà ouravant cun la VR ün contrat chi garantischa la surtutta dals cuosts. Ün spettar e dumandar ouravant ün credit supplementar per quist agir nu füss statt pussibel resguardand l'organisaziun dal proget. Impustüt las OEE SA faivan permanentamaing squitsch süls termins da furniziun da la forz'electric per lur staziun da transfuormaziun in Tantermozza. Quia d'eira il problem la lingia da mezza tensiun i'l fuond da la val chi vaiva da gnir fabricada inavo a temp ütil.

Las partidas pertoccas OEE SA, VR (RhB), Salt Mobile SA, Strimer, Freimüller e la società da chatschaders Sarsura sun orientats sur dal rendaint e til han eir approvà resp. surgni il quint final per pajar.

Schi's resguarda quai chi s'ha rajiunt in quist lö (Arduond, God Arduond, Tantermozza e Carolina), schi as po resguardar il proget sco grond success. Na sco ultim po uossa – eir causa quist grond proget d'incablaint - l'EW Zernez furnir davent da Carolina la forz'electric per la fabrica da las sanaziuns dals tunnels e quai pels prossems 15 ons.

Ushè po il credit gnir serrà giò e preschantà a quista radunanza cumünala.

L'andamaint dal proget es stat eir in quist cas complex, causa la coordinaziun tanter l'EW Zernez, las OEE SA e la Viafier Retica. Eir es stat da coordinar fich bain cun las lavurs eir complexas dal proget «EW Nord». Tuot es i bain ed ha fin l'ultim funcziunà a cuntantezza da tuots. In quist lö po l'EW Zernez uossa quintar cun üna soluziun da la rait electrica fich stabila e parderta per tuot ils svilups.

Il credit oriund es gnü surpassà per 132'276.00 chf, quai sun 49.0 %. Las contribuziuns da las partidas pertoccas sun gnüdas surpassadas per 127'732.20 chf, quai sun 48.2 %. Ils cuosts restants per l'EW Zernez s'amuntan a 9'543.80 chf, quai chi sun 2.37% dals cuosts cumplexivs da proget.

Proget cumplexiv: Muglinè vest – fabricas d'infrastructura

660'000 chf Muglinè vest – etappas 1 e 2

Il plan da quartier Muglinè a Zernez ha pudü gnir serrà giò cun grond success. La planisaziun cun fabrica da bod tuot l'infrastructura ha dürà raduond 7 ons. Cun l'entrada in vigur legala dal scumpart da cuosts d'infrastructura als 11-01-2021 es il proget terminà. Per pudair serrar giò eir il proget our d'vista finanziaria, cumünala vegn in quist mumaint preschantà il rendaint final dals credits approvats, a man da quista radunanza cumünala.

			<i>cuosts totals</i>	<i>a charg dal Cumün da Zernez</i>	<i>a charg dals privats</i>
Provedimaint aua parcellas 205 e 1267 (ex 205-A e205-B)			42'815.17	32'111.38	10'703.79
Spostamaint lingias causa fabricat sülla parcella 204			39'226.63	39'226.63	
Cuosts per provedimaints cumünals sco igluminaziun publica, fibr'optica, electric e aua suos-cha			81'576.40	81'576.40	
da quels cuosts restants chi sun stats relevants pel scumpart da cuosts			339'729.15	101'918.75	237'810.41
Cuosts totals da l'infrastructura			503'347.35		
... van a charg da l'interess public				254'833.15	
... van a charg dals possessurs da las parcellas					248'514.20
Stadi da contos da la contabilità finanziaria					
Qul	6150.5010.04*	Muglinè vest – etappas 1 e 2	432'503.45		
Qul	6150.6110.80*	Restituziuns tras terzs		-248'108.05	
QuS	6150.3141.20	Igluminaziun publica			3'000.00 #1
Qul	7101.5031.05*	Zernez – Muglinè vest 1 e 2 – part aua	55'221.65		
Qul	7201.5032.04*	Zernez – Muglinè vest 1 e 2 – part aua suos-cha	3'620.75		
Qul	8711.5034.07*	Muglinè etappa 1 – part electric	12'001.50	da total	29'047.15 #2
Qul	8900.5030.00	Fibr'optica Zernez - basa			6'800.00 #3
<i>Differenza da contabilisaziun sur ons oura</i>				-406.15	
Total cuosts da proget (brutto)			503'347.35		
Total partecipaziun da partidas privatas				-248'514.20	
Total cuosts da proget a charg dal cumün (netto)				254'833.15	

Special

_ Las contabilisaziuns da tuot ils cuosts es statta complexa. I s'ha stuvü resguardar tanter oter:

- differents quints (quint d'investiziun e quint da success)
- proget es gnü inizià dal 2010 cul pass da planisaziun da quartier e terminà dal 2021 cul rendaquint da cuosts d'infrastructura
- differentas decisiuns da progets (p.ex. provedimaint electric, da fibr'optica e d'igluminaziun publica nu d'eira oriundamaing calculà cun ingüns cuosts)
- etappaziun da las investiziuns cun differents portaders da cuosts (partidas privatas e man public)
- spostamaint da lingias causa proget da fabrica sülla parcella no. 204 (Terretaz SA)
- # 1-3 = cuosts (per part) a charg dal credit Qul e/o a charg dal QuS

Finanziaziun		
Credit da finanziaziun	Radunanza cumünala dals 12-12-2017	660'000
<i>Cuosts effectivs da proget</i>	<i>effectiv</i>	<i>503'347</i>
Partecipaziuns privatas	Radunanza cumünala dals 12-12-2017	-270'000
<i>Partecipaziuns privatas effectivas</i>	<i>effectiv</i>	<i>-248'514</i>
Cuosts nets restants pel Cumün da Zernez	Radunanza cumünala dals 12-12-2017	390'000
<i>Cuosts nets restants pel Cumün da Zernez effectivs</i>	<i>effectiv</i>	<i>254'833</i>

Il credit es gnü suotpassà per -156'652.65, quai sun -23.7 %. Ils cuosts restants pel cumün s'amuntan a 254'833.15, dimena per -34.6 % resp. -135'166.85 plü bass co previs.

Il president cumünal remarcha, chi s'ha uossa preschantà in pacs minuts ses progets chi sun gnü serrats giò, in l'import da raduond 1.4 milliuns francs e contribuziuns da s-chars 800'000 francs. Quistas lavurs liain ün pruna resursas e ils respunsabels ston accompagnar ed organisar quist progets per part eir fich complexs ed eir impustüt da pisserar chi aintran las contribuziuns dal public resp. las partecipaziuns dals privats. Quists progets a favur da nus tuots nu gratajan adüna sainza intops e sbagls. I vegnan manats tenor meglider savair e pudair.

Schimun Grass sco president da la cumischiun sindicatoria infuorma sur da la lavur da la cumischiun survaglianta d'urant l'on da gestiun 2022, cun muossar via sün lur lezchas, respunsabilitats e dovairs. Specialmaing ha la cumischiun sindicatoria controllà als 17 gün ed als 15 november seguaints secturs ed incumbenzas cumünalas:

- contrats da lavur d'impiegadas e d'impiegats cumünals, cun quaderns da dovairs
- organizaziun da l'EW Zernez
- evaluaziun dal process da fabrica in connex culla nouva basa da l'uffizi da construcziun bassa in Scheschna
- tematica da taxas da cura e carta da giasts
- survista da parc da veiculs
- organizaziun da fittanza da parcelas in possess cumünal
- dumondas davo stadi dal sistem da controlla (IKS – internes Kontrollsystem)
- discuors persunal cun l'antierur coordinatur turistic
- discuors persunals in connex culla nouva situaziun illa secziun da las Gestions Tecnicas davo la desditta e la deliberaziun da drets e dovairs da l'antierur manader da secziun.

Davo mincha controlla da gestiun vain dat giò a la direcziun operativa ün rapport chi vain lura trattà e surlavurà. Las respostas e posiziuns vegnan registradas i'l rapport ed approvadas da la suprastanza cumünala. Al rendaquint 2022 chi'd es gnü preschantà in detagl po la cumischiun sindicatoria remarchar, cha la situaziun finanziaria, actuala saja tendüda e cha be cun buns cash flows i'ls prossems ons sarà pussibel da finanziar tuot ils progets chi sun previs.

La cumischiun sindicatoria propuona d'approvar il bilantsch, il quint da success e'l quint d'investiziuns sco preschantà e da dar dis-charg als organs ed a tuot il persunal, cun ingrazchar a tuots per la gronda lavur prestada.

In assenza da las commembras e'ls commembers da la suprastanza cumünala e da la direcziun operativa nu dumonda ingün il pled.

La radunanza cumünala ha approvà cun unanimità da vuschs il bilantsch, il quint da success e'l quint d'investiziuns per l'on da gestiun 2022 e dat dis-charg a gremis e persunal. Implü sun gnüts approvats resp. tut a cogniziun tuot ils rendaquints da credits approvats preschantats.

Domenic Toutsch intuna l'importanza da tgnair fich bain in ögl la situaziun finanziaria dal cumün. El repeta in che direcziun cha'l rendaquint cumünal as schmuainta. Quist voul dir cha la suprastanza cumünala sto sur stübgjar differentas posiziuns dal rendaquint. Voul dir i nu sarà plü pussibel da accumplir tuot ils giavüschs. In congual cun oters cumüns illa grondezza da Zernez, spordschain nus ourdvar bler, sco bogn, loipas, glatsch, ün scoula nouva etc. In oters plects vaja uossa per optimar e mantgnair quai chi'd es avantman. Dit in oters plects sto gnir tratta la tschinta, avant sco cha gnina masinats da Cuaira! Per quist intent voul quai minchüna e minchün da nus votantas e votants.

Il president cumünal ingrazcha a la populaziun per la fiduzcha demuossada. Plünavant va ün grond grazcha fich a las collavuraturas ed als collavurats, a la direcziun operativa, a la suprastanza cumünala sco eir a la cumischiun sindicatoria ed al post da revisiun extern per la gronda lavur prestada d'urant l'on 2022.

3 Approvaziun d'ün contrat da concessiun per la retratta d'aua da fuond cun la Terretaz SA a Zernez

La firma Terretaz SA a Zernez prevezza da rimplazzar seis s-chodamaint d'öli per la chasa no. 103A sülla parcella no. 289 in Curtins cun üna pompa da chalur cun nüzziar l'aua da fuond. Id es previs ün bügl d'aua da fuond illa chafuollezza da 35 meters. Als 28-11-2022 es gnüda inoltrada la dumonda da fabrica per las sondaschas da prova correspudenta tras la Terretaz SA. Las lavurs da fourar vegnan fattas d'urant quist'on.

Per pudair pussibilitar l'intent fa la Terretaz SA in quist mumaint la dumonda da concessiun per la retratta d'aua da fuond sün sia parcella no. 289 in Curtins. La retratta maximala d'adöver s'amunta a 600 liters per minuta. Las taxas unicas ed annualas sun adattats als contrats similis ed a la quantità d'aua chi vegn retratta. Il contrat da concessiun ha üna d'urada da 25 ons. Il permiss chantunal da l'uffizi per la natüra e l'ambiant nun es amo avantman. La concessiun cumünala dess gnir datta, be suot la premissa, cha tuot ils permiss chantunals sun eir avantman.

La radunanza cumünala ha approvà, in assenza dals manaders da la firma Terretaz SA, cun unanimità da vuschs il contrat da concessiun per la retratta d'aua da fuond cun la Terretaz SA a Zernez sainza müdamaints.

4 Preparaziun e rinviaziun d'üna revisiun parziala da ledscha cumünala da chamonnas a man da la votaziun a l'urna

Il suprastant respunsabel Riet Denoth manzuna, cha la suprastanza cumünala vaiva decis d'urant l'ultima procedura d'annunzcha per la fittanza da diversas chamonnas cumünalas a Zernez ed a Susch amo i'l december 2022 da vulair reveder la ledscha cumünala da chamonnas ed uschè metter in net l'üna o l'otra ingüstia. Cun quista revisiun dess impustüt gnir resguardada la fracziun da Brail sco tschellas trais fracziuns. Implü sun gnüdas definitis nouv ils seguaints puncts relevants:

Art. 3	Organs cumpetents	La suprastanza po decider da surdar cumpetenzas.	<i>Na plü explizit a la direcziun operativa.</i>
		La suprastanza po decider in cas extraordinaris.	<i>Nouva pussibilità per decider svelt e sainza gronda bürocrazia.</i>
Art. 5 a)	Premissas personalas dal fittadin	Domicil legal (rechtlicher Wohnsitz) e quel d'impostas (steuerlicher Wohnsitz) ston esser accumplits tuots duos.	<i>Precisaziun.</i>

Art. 5 c)		La fuorma da «concupinat» nu daja i'l sen dal dret. La fuorma «sumgliaint ad ün matrimonii» vuol dir «eheähnliche Form» es plü adattada per quista ledscha. Implü vala la pretaisa «illa medemna chasada».	<i>Precisaziun da las fuormas actualas da convivenza.</i>
Art. 5 e)		Ingüns debits scadüts invers il cumün.	<i>Nouva cundiziun.</i>
Art. 6, al. 1 a)	Annunzchas	1. precisaziun (principala) da rinforzar la fracziun da Brail. 2. Per las fracziuns da Susch e Lavin valan ils cunfins dals oriunds duos cumüns. 3. Per la fracziun da Brail daja ün plan da perimeter aposta (be) per las chamonnas e per quista ledscha . Il rest es lura la fracziun da Zernez.	<i>Scopo principal per quista revisiun da la ledscha.</i>
Art. 6, al. 4		Schi vess da dar be ün'unic'annunzcha, nu dess gnir manada tras la procedura vasta da surdattas etc.	<i>La suprastanza cumünala decida in quist cas.</i>
Art. 6, al. 6		In cas specials dess la suprastanza cumünala pudair decider s'vess, davo avair trat la büs-cha.	<i>Vala be in cas extraordinaris, argumentats.</i>
Art. 7, al. 1 b)	Cundiziuns da contrat	Ils fits dessan resguardar üna tscherta egalità.	<i>Ils fits vegnan surlavurats ed armonisats sül 2024.</i>
Art. 7, al. 1 c)		Precisescha, cha davo la mort dal fittadin nu dessan ils iertavels avair la pussibilità da <u>prolungar sco iertavel(s)</u> il contrat (davo maximalmaing ot ons).	<i>Precisaziun per contrats tenor nouva ledscha.</i>
		<i>Vala da princip: Tenor DO (OR) vala, cha'ls iertavels aintran i'l contrat automaticamaing sco «fittadin» davo la mort da tal.</i>	
Art. 7, al. 1 d)		Il cumün nu dess stuvair far valair interess public per decider sur d'adövers da las chamonnas.	<i>Interess public po esser greiv d'argumentar.</i>
Art. 7, al. 1 e)		Il cumün po desdir il contrat i'ls cas descrits eir d'urant l'on.	<i>Quist per avair la pussibilità da resguardar üna d'urada da desditta tenor DO (OR).</i>
Art. 7, al. 1 f)		Regla il cas, schi's müda la situaziun da possess o da fittanza d'ün'otra chamonna, d'urant la fittanza actuala d'üna chamonna.	<i>Minimescha il ris-cha la medemna chasada profita da plüssas chamonnas.</i>
Art. 7, al. 1 j)		1. fabricats novs, rimplazzamaints, adattamaints, renovaziuns substanzialas vi dal(s) stabilimaint(s) (sco per exaimpel paraids, fuonds, tet, chamin, drenascha eop.) chi surpassan ils obligs da mantegnimaint dal fittadin, pon gnir contribuets dal cumün. 2. investiziuns sainza caracter da mantegnimaint (sco per indrizs solars, aua in chasa, plattas e pignas, grigls mürats, mobiglia francada eop.) restan per adüna part da la chamonna sainza dret dal fittadin da tour cun sai a la fin da la fittada e sainza dret da quel sün ün'indemnisaziun.	<i>La suprastanza cumünala decida tenor aigna libertà da decider che fabricats, investiziuns etc. chi pon gnir resguardats tenor quist'alinea.</i>
Art. 8, al. 1	Fittanzas existentas	La direenziun operativa nu dess esser manzunada explicitamaing in quist artichel.	<i>La suprastanza cumünala po surdar quist'incumbenza inavant a la direenziun operativa.</i>
Art. 8, al. 2		Regla da surpuntamaint (Übergangsregelung) per amortisaziuns d'investiziuns fattas fin als 31-12-2022.	
Art. 8, al. 3		Ils fits annuals vegnan armonisats a böen dal princip d'egalità tras la suprastanza cumünala suls 1. schner 2024. Il princip d'egalità dess cuntgnair almain ils puncts stadi dal stabel, investiziuns e mantegnimaint ad agen cuosts, surfatscha d'adöver, raziundschabilità stagiunala ed access da trafic ed aua. Il cumün infuorma ils fittadins actuals fin il plü tard als 30 november 2023 sur dals müdamaints dals fits annuals chi vegnan propuonüts.	

Il sböz da quista revisiun es gnü preparà da la suprastanza cumünala. Il plan da perimeter da chamonnas per la fracziun da Brail dess nouv far part da quista ledscha.

Il Cumün da Zernez es per definiziun illa constituziun cumünala ün cumün da lingua rumantscha. Perquai pretenda il Chantun Grischun cha las ledschas cumünalas sun scrittas illa lingua costituziunala e cun quai sto la ledscha eir gnir approvada in quista lingua, in quist cas in Rumantsch, idiom vallader (art. 5). Perquai vala la versiun rumantscha sco versiun legalmaing valabla ed uschè eir sco versiun uffiziala. Üna traducziun da quista ledscha in lingua tudais-cha nun es previsa.

L'entrada in vigur da la revisiun parziala da la ledscha da chamonnas es previsa davo l'approvaziun tras la votaziun a l'urna. La votaziun a l'urna es previsa suls 18 gün 2023.

La documainta da detagl es statta publichada illas actas da la radunanza cumünala. Eir es stat publichà il sböz da quista revisiun cun ün documaint chi muossa oura ils müdamaints tanter versiun actuala e'l sböz

manzunà. Quistas actas as ha pudü retrar eir pro'l fanestrigl da l'administraziun cumünala e/o sülla pagina d'internet www.zernez.ch.

I'l mais gün gnarà publichada amo üna vouta la procedura d'annunzcha per las chamonnas Ivraina, Ova Spin II e per las duos chamonnas in Fless Dadaint. Annunzchas oriundas inoltradas dal 2022 valan sco inoltradas. Retrattas e/o ulteriuras annunzchas han da gnir indichadas in scrit d'urant la d'urada da publicaziun dals inserats. Las fittanzas pon lura avair lö a partir da la tratta da la büs-cha, chi varà lö vers la fin da gün fin mità lügl 2023.

Ouravant ha il president infuormà insembel cul chanzlist cumünal, chi's propuona seguaints adattamaints da precisaziun in pacs artichels, davo avair gnü publichà la missiva. Quai sun (scrits in culur):

No. artichel	Versiun actuala	Versiun proponüda illa missiva	Versiun <i>adattada/precisada</i> i'l fratemp a man da quista radunanza cumünala
Art. 7, al. 1, custab c)	la d'urada da contrat es 8 ons cun ün dret d'opziun unilateral a favur dal fittadin per ulteriuras prolungaziuns dal contrat adüna per la d'urada dad 8 ons, però be sch'el accumulscha pro la prolungaziun amo adüna tuot las premissas personalas per interessents tenor art. 5 e nun ha cuntrafat a quista ledscha opür als obligs dal contrat da fittanza. L'administraziun cumünala preavisescha il fittadin almain 6 mais avant la data da scadenza da la fittanza, sur da l'opziun da prolungaziun. Sur da prolungaziuns decida la direcziun operativa;	La d'urada da contrat es 8 ons cun ün dret d'opziun unilateral a favur dal fittadin, v.d. be culla persuna culla quala es gnü abinà il contrat da fittanza, per ulteriuras prolungaziuns dal contrat adüna per la d'urada dad 8 ons, però be sch'el accumulscha pro la prolungaziun amo adüna tuot las premissas personalas per interessents tenor art. 5 e nun ha cuntrafat a quista ledscha opür als obligs dal contrat da fittanza. Il cumün preavisescha il fittadin almain 6 mais avant la data da scadenza da la fittanza sur da l'opziun da prolungaziun; Sur da prolungaziuns decida la direcziun operativa;	La d'urada da contrat es 8 ons cun ün dret d'opziun unilateral a favur dal fittadin, v.d. be da la(s) persuna(s) obain d'üna da las personas culla(s) quala(s) es gnü abinà il contrat da fittanza, per ulteriuras prolungaziuns dal contrat adüna per la d'urada dad 8 ons, però be sch'el accumulscha pro la prolungaziun amo adüna tuot las premissas personalas per interessents tenor art. 5 e nun ha cuntrafat a quista ledscha opür als obligs dal contrat da fittanza. Il cumün preavisescha il fittadin almain 6 mais avant la data da scadenza da la fittanza sur da l'opziun da prolungaziun; Sur da prolungaziuns decida la direcziun operativa;
Art. 7, al. 1, custab e), cifra 2)	da nouv adöver permanent d'alpagiadas pro alps fin qua dattas a fit sco chamonnas;	da nouv adöver permanent l'alpagiada pro alps fin qua dattas a fit sco chamonnas	da nouv adöver permanent per l'alpagiada pro alps fin qua dattas a fit sco chamonnas
Art. 7, al. 1, custab g)	pro mortoris dal fittadin valan las disposiziuns dal Dret d'Obligaziuns (DO);	Pro mortori(s) dal(s) fittadin(s) valan las disposiziuns dal Dret d'Obligaziuns (DO);	Pro mortori(s) dal(s) fittadin(s) valan las disposiziuns dal Dret d'Obligaziuns (DO). Pro contrats da fittanza cun duos fittadins (solidaric) vala il seguaint: Crouda oura ün dals duos fittadins, ha il fittadin chi resta i'l contrat inavant sulet tuot ils drets e dovairs contractuals;
Art. 7, al. 1, custab j)	tuot ils müdamaints vi dal stabilimaint ed investiziuns dal fittadin chi surpassan seis obligs da mantegnimaint, pon gnir fats be cul acconsentimaint in scrit dal cumün. Talas investiziuns cun import acceptà dal cumün davo realisada l'investiziun vegnan restituidas a la fin da la	Fabricats nouvs, rimplazzamaints, adattamaints, renovaziuns substanzialas vi dal(s) stabilimaint(s) (sco per exaimpel parais, fuonds, tet, chamin, drenascha eop.) chi surpassan ils obligs da mantegnimaint dal fittadin, han il dret da gnir finanziats tras il	Fabricats nouvs, rimplazzamaints, adattamaints, renovaziuns substanzialas vi dal(s) stabilimaint(s) (sco per exaimpel parais, fuonds, tet, chamin, drenascha eop.) chi surpassan ils obligs da mantegnimaint dal fittadin, han il dret da gnir finanziats tras il

	fittanza al fittadin, scrivond giò da l'import oriund 10% per on chalendarì cumplet. Investiziuns sainza caracter da mantegnimaint sco indrizs solars, aua in chasa, grigls etc. restan per adüna part da la chamonna sainza dret dal fittadin da tour cun sai a la fin da la fittada e sainza dret da quel sün ün'indemnisaziun;	cumün. Quistas investiziuns ston gnir preavisadas ouravant in scrit e pon gnir realisadas be cun l'acconsentimaint dal cumün e cun la conferma da contribuziun cumünala. Il fittadin nun ha ingün dret invers il cumün da pretender investiziuns manzunadas. Investiziuns sainza caracter da mantegnimaint (sco per indrizs solars, aua in chasa, plattas e pignas, grigls mürats, mobiglia francada eop.) restan per adüna part da la chamonna sainza dret dal fittadin da tour cun sai a la fin da la fittada e sainza dret da quel sün ün'indemnisaziun. La suprastanza cumünala decida tenor aigna libertà da decider che fabricats, investiziuns etc. chi pon gnir resguardats tenor quist'alinea.	cumün. Quistas investiziuns ston gnir preavisadas ouravant in scrit e pon gnir realisadas be cun l'acconsentimaint dal cumün e cun la conferma da contribuziun cumünala. Il fittadin nun ha ingün dret invers il cumün da pretender investiziuns manzunadas . Investiziuns sainza caracter da mantegnimaint (sco per indrizs solars, aua in chasa, plattas e pignas, grigls mürats, mobiglia francada eop.) restan per adüna part da la chamonna sainza dret dal fittadin da tour cun sai a la fin da la fittada e sainza dret da quel sün ün'indemnisaziun. La suprastanza cumünala decida tenor aigna libertà da decider che fabricats, investiziuns etc. chi pon gnir resguardats tenor quist'alinea.
--	---	---	---

Insembel cun quists adattamaints vala il sböz da la ledscha revaisa, gnüda preparada per quista radunanza sco basa da decisiun per trattar ed inviar a la votaziun a l'urna.

In üna discussiun fich vasta e per part eir emoziunala s'han diversas personas exprimidas a regard parts da la revisiun da la ledscha cumünala da chamonnas preschainta. In fuorma resümanta as prouva da tour insembel ils votums plü importants.

Impustüt davart da votantas e da votants da la fracziun da Brail es gnü critic'hà, cha la suprastanza cumünala vould s-chaffir ün nouv cunfin arbitrari tanter las duos fracziuns da Brail e Zernez. Uschè ün cunfin nun haja plü dat daspö tschientineras. Davart da Brail nu faja dabsögn da quist cunfin artificial.

Ün oter votant da Brail vuless plü gugent perseguitar la via da crescher insembel davu la fusiun co crear novs cunfins, na consequents, sco per exaimpel quels propuonüts in Pülschezza e Tantermozza. El temma plünavant cunfins futurs illa revisiun da la ledscha champestra, chi sta davant porta e chi sarà lura importanta per l'agricultura.

Ün votant monescha il fat, cha l'art. 5 b), actualmaing valabel, ma na part da quista revisiun, impedescha tanter oter, cha personas cun aigna proprietà/conproprietà/proprietà cumplessiva o oters drets reals o fittanzas vi dad üna chamonna privata sün territori cumünal da s'annunzchar per üna chamonna cumünala. El es da l'avis cha eir personas cun possess privat da chamonnas sün territori cumünal nu dessan in avegnir plü gnir exclusas dal dret d'annunzcha per chamonnas cumünalas.

Ün ulteriur votant es da l'avis cha la proposta da la suprastanza cumünala es buna e va illa direcziun güsta. Unicamaing monescha el, cha l'adattamaint da sistem, cha'l cumün vess da surtour ils cuosts importants da sanaziun/mantegnimaint, pudess chaschunar cuosts considerabels per la generalità. El as mettes avant, cha tscherts obligs da cuosts restan eir inavant pro la fittadina / pro'l fittadin. Davart dals respunsabels politikers vegn orientà, cha l'intent cun quist adattamaint da sistem dess esser quel, cha minchüna e minchün dessa avoir la pussibilità (finanziala) da s'annunzchar per üna chamonna. In quista direcziun propuona ün ulteriur votant e fittadin d'üna chamonna, cha'l cumün ha l'oblig d'avair la controlla scha fittadinas e/o fittadins vegnan davu a lur dovairs da mantegnimaint dals stabels o brich.

Da la discussiun sun resultadas seguaintas tematics chi sun importantas:

- tematica d'ün nouv cunfin tanter las fracziuns da Brail e Zernez
- tematica d'annunzchas per chamonnas cumünalas eir per persunas cun possess privat (chamonnas) sün territori cumünal
- tematica da müdamaint da sistematica da la surtutta d'investiziuns da sanaziun/mantegnimaint

Il president cumünal bada, cha la discussiun es exausta. El voul inchaminar a la decisiun e fa quai cun vuschar il prüm sur da las propostas e davo cun far üna votaziun finala a regard la proposta finala a man da la votaziun da l'urna dals 18 gün 2023.

Votaziun 1

Art. 6, al. 1 a) - tematica da definiziun d'insomma ün perimeter da chamonnas per la fracziun da Brail

Sün proposta ed intimaziuns da convaschins da la fracziun da Brail nu dess la ledscha futura far differenza tanter la fracziun da Brail e quella da Zernez, dimpersè dess in quist connex restar l'artichel uschè co ch'el d'eira. Voul dir chi nu dess gnir defini ün plan da perimeter da chamonnas per la fracziun da Brail, uschè sco proponü da la suprastanza cumünala.

La radunanza cumünala ha decis in quista votaziun cun 29 cunter 22 vuschs per la proposta dal votant e cunter la proposta da la suprastanza cumünala e cun quai da laschar l'artichel 6, alinea 1 a) uschè sco ch'el es scrit illa ledscha actualmaing valabla, voul dir sainza crear ün nouv perimeter da chamonnas per la fracziun da Brail.

Votaziun 2

Art. 5, b) - tematica chamonnas cumünalas obain privatas sün territori cumünal

Sün proposta d'ün convaschin da nun excluder plü cha possessuras e possessurs (etc. tenor art. 5 b)) d'aigas chamonnas cumünalas obain privatas sün territori cumünal nu pon s'annunzchar per üna chamonna cumünala dess gnir adattà l'artichel 5, b) correspondentamaing, v.d. cha quai dess esser pussibel in avegnir.

La radunanza cumünala ha decis in quista votaziun cun 45 cunter 17 vuschs cunter la proposta dal votant e per quella da la suprastanza cumünala e cun quai da laschar l'artichel 5, alinea b) uschè sco ch'el es scrit illa ledscha actualmaing valabla.

Sün dumonda dal president cumünal, scha qualchün voul exprimer amo ulteriuras proposta nu s'ha annunzchà ingün da las preschaintas e dals preschaints.

La radunanza cumünala ha deliberà illa votaziun finala cun 62 cunter 5 vuschs la proposta adattada culla votaziun 1 manzunada da la revisiun da la ledscha cumünala da chamonnas a man da la votaziun a l'urna. La versiun ufficala es in lingua rumantscha.

L'entrada in vigur da la revisiun parziala da la ledscha da chamonnas es previssa davo l'approvaziun tras la votaziun a l'urna. La votaziun a l'urna es previssa süls 18 gün 2023.

5 Comunicaziuns e varia

5.1 Comunicaziuns

Flüm Spöl

Tematica da massa bler material e glera i'l let dal flüm Spöl (s-chatsch da la grava - Geschiebetrieb)

Las novas instanzas cumünalas ha stuvü tour per mans quista problematica fich importanta e sun actualmaing illa discussiun, impustüt cun las OEE SA a Zernez. I's temma dons vi da parcelas agriculas, stabels cumünals e vi da la Punt Spöl in cas d'ardschantadas na controllablas.

Tematica da surtutta cuosts da sanaziun causa contaminaziun da PCB

Üna grupp da lavur interna cun agüd da perits externs as fatschenda daspö la decretaziun in november 2022 da surtutta da cuosts tras l'uffizi chantunal per la protecziun da la natüra (ANU GR) da quista problematica. Tenor il decret manzunà stuvest il cumün surtour üna part dal cuosts fich ots per la sanaziun dal Spöl, na chaschunà dal cumün. Pel mumaint es in trais-cha üna procedura giuridica in quist cas.

5.2 Varia**Dumondas e permiss da fabrica**

Il suprastanza cumünal e respunsabel per la fabrica e per la planisaziun locala, Duosch Städler giavüscha a tuottas ed a tuots, per spargnar munaida, nerva, malinclettas e dispittas da's tgnair vi da la legislaziun, impustüt sül sector da fabrica. Eir pro intents da fabrica plü pitschens as dess contactar a temp l'administraziun da fabrica cumünala obain ad el sco suprastant cumünal e dumandar, scha e che dumonda da fabrica chi'd es necessaria. In mincha cas voul il cumün perseguitar e tgnair aint las ledschas da fabrica. Pel mumaint as es landervia a schoglier e finir giò cas da fabrica, eir cun perseguitar proceduras da chasti. Duosch Städler intimescha a minchüna ed a minchün da resguardar quist giavüsche e d'intimar a vaschins, amis e collegas da far quai medemmamaing.

Chesa Polivalenta Brail

Ün votant da la fracziun da Brail intimescha als respunsabels da pisserar, cha eir personas plü attempadas e cun impedimaints possan superar la s-chala d'access a la Chesa Polivalenta. Il president cumünal po infuormar in quist connex, chi's es landervia a concepziunar üna piazza da giovar per uffants in quist lö e cun quai as pudess güsta analisar eir l'access sco intimà.

5.3 Surdatta dal premi d'energia 2022

In november 2014 ha surgni il Cumün da Zernez pel proget Zernez Energia 2020 il premi da clima "Zürich Klimapreis Schweiz & Lichtenstein", dota cun 10'000 chf. La cumischiun dal proget ha fat impissamaints sco chi pudess gnir dovrada quista munaida, e decis da premiar minch'on ün intent da fabrica chi'd es gnü realisà in sen dal proget Zernez Energia 2020 in resguardand las ledschas e prescripziuns correspondentas cun ün import da 1'000.00 chf. Quel patrun da fabrica chi ha raggiunt cun seis agir resp. cullas sanaziuns energeticas il meglder resultat da quel on, dess gnir premià cun l'import manzunà ed cun üna placketta. Tenor ils criteris sun ils vendschaders per l'on 2022 **Monika** e **Michael Schnieper, Zernez**. Culla sanaziun energetica da lur chasa, sco eir il rimplazzamaint dal s-chodamaint d'öli es gnü praista üna contribuziun per la protecziun dal clima e da l'avegnir da Zernez. Sinceras gratulaziuns per quist premi. Monika e Michael Schnieper sun displaschaivelmaing absaints. Els laschan però ingrazchar fich per quist'undrentscha. Els s'allegnan fich.

5.4 Saramantaziun dal suprastant cumünal Jürg Wirth

Tenor art. 13 da la constituziun cumünala ha d'avair lö, vairamaing avant l'entrada in uffizi, üna saramantaziun da la suprastanza cumünala nouv'eletta. Causa l'absenza da Jürg Wirth, nouv'elet commember da la suprastanza cumünala süls 1. schner 2023, a la saramantaziun dals 13-12-2022 es gnü tut davo quist act in quista radunanza cumünala. Il suprastant cumünal Jürg Wirth ha impromiss d'accomplir tuot ils dovairs tenor dret e güstia e tenor meglder savair e pudair.

Dürada da la radunanza:
20:00h fin 22:20h

Il president

Domenic Toutsch
Domenic Toutsch



Il chanzlist

Corsin Scandella
Corsin Scandella

Publicaziun dal protocol:

Il protocol es stat publichà dals 17 lügl 2023 fin 16 avuost 2023. Inu sun entradas ingünas protestas cunter quist protocol.